




ՊԱՇՏՈՆԱԿԱՆՔ

ՎԵՀԱՓԱՌ ՀԱՅՐԱՊԵՏԻ ՕՐՀՆՈՒԹՅԱՆ ԽՈՍՔԸ ՆՈՐ ՏԱՐՎԱ
ԱՌԹՎ ՀԱՅԱՍՏԱՆԻ ՀԵՌՈՒՍՏԱՏԵՍՈՒԹՅԱՄԲ
(Ս. Էջմիածին, 31 դեկտեմբեր 1993 թ.)

Աստվածային տիեզերական տնօրինությամբ, մեր երկրագունդը մեկ անգամ ևս մի պտույտ կատարեց արեգակի շուրջը: Բացվեցին դռները Նոր տարվա, 1994 թվականի:

Այս պահը հանդիսավոր է և խորհրդավոր: Բոլոր ժամանակներում, մարդիկ դիմավորել են Նոր տարին ուրախությամբ, նոր հույսերով, նոր երազանքներով, նոր աղոթքներով:

Մենք կուգենայինք այս Նոր տարին դիմավորել ձեզ հետ մեր Տերու-
նական աղոթքով՝

Հայր մեր որ յերկինս ես, սուրբ եղիցի անուն քո, եկեսցէ արքայութիւն
քո, եղիցին կամք քո որպէս յերկինս և յերկրի. զհաց մեր հանապազորդ
տուր մեզ այսօր. և թող մեզ զպարտիս մեր, որպէս և մեք թողումք մերոց
պարտապանաց. և մի՛ տանիր զմեզ ի փորձութիւն, այլ փրկեա զմեզ ի չա-
րէն:

Այո՛, փրկյա՛ մեզ, Տեր, ի չարէն և մի՛ տանիր զմեզ ի փորձություն:

Հատկապես մեր ժամանակներում, երբ ողջ մեր ժողովուրդը, որ ի Հա-
յաստան և հԱրցախ, ապրում են դժվարին օրեր և տագնապալի պահեր,
այո՛, մենք բոլորս աղոթում ենք, որ Աստված մեր ազգը հեռու պահի ամեն
տեսակ փորձություններից և չարի որոգայթներից, փորձություններ ու չա-
րի որոգայթներ, որոնք շրջապատած են մեզ և սպառնում են մեր ազգային
կյանքի գոյատևմանն ու խաղաղությանը, մանավանդ Հայոց չքնաղ աշ-
խարհ Արցախում:

Հարազատներ՝ մեր, այս պահին կուգենայինք լինել ձեզանից ամեն
մեկի կողքին ու լսել ձեր վիրավոր սրտերի տրոփյունը, ձեր մորմոքը, ձեր

աղերսը, կուգենայինք լսել ձեր զրկանքների և այս ծանր ձմռան գիշերներին՝ ձեր դժվարությունների մասին, մեր պարտքը համարելով մեղմացնել ձեր դժվարությունները, ոգեշնչել ձեզ նոր հույսերով, նոր հեռանկարներով:

Մի՛ երկնչիք, մի՛ վհատվեք, մնացե՛ք հավատարիմ մեր սուրբ հավատքին, մեր Առաքելական Մայր Եկեղեցուն, նեցո՛ւկ կանգնեցեք միասնաբար ու համերաշխ՝ մեր անկախ պետականության, և նույնիսկ ամենածանր կացությանց մեջ, ձեր ճակատները պահեցե՛ք բարձր ու միշտ հպարտ:

Նոր տարին, այո՛, մեզ բերում է հույսը նոր ապագայի, նոր նվաճումների, նոր հաղթանակների:

«Բա՛ց մեզ, Տէր, զդուռն ողորմութեան Քո և ցո՛յց մեզ զճանապարհս Քո արդարութեան և խաղաղութեան»:

Սիրելիներ՝ մեր, շնորհավորում ենք ձեր Նոր տարին. «ողջ լերուք զօրացեալ սուրբ Հոգով և յաւէտ օրհնեալ ի Տեառնէ և ի Մէնջ»: Ամեն:

